



USO Info 2025 | 01

L'Uffizi dal servetsch social chantunal infurmescha

Survista dals temas

- Dapli sustegn per la tgira d'uffants en il Grischun
 - Viver cun in impediment – participaziun, egualitad e protecziun cunter discriminaziun
 - Il sistem per gestiunar ils cas dals fatgs socials daventa plaunet realitad
 - Dis d'acziun cunter violenza a chasa 2025
 - Politica d'uffants e da giuvenils: vuschs giuvnas gidan a concepir l'avegnir
 - Agid social en transformaziun: barat tranter las vischnancas a chaschun da l'occorrenza per las vischnancas
 - Inscunter da barat chantunal davart la problematica duala dipendenza e violenza a chasa
 - Savevas Vus che...
-

Dapli sustegn per la tgira d'uffants en il Grischun

A partir dal 1. d'avust 2025 entra en vigur la revisiun totala da la Lescha davart la promoziun da la tgira d'uffants complementara a la famiglia en il chantun Grischun (LTGU). La lescha rinforza la cumpatibilitad da la professiun cun la famiglia tras quai che la distgargia finanziaria s'orientescha a l'entrada decisiva e tras quai che las contribuziuns per la tgira d'uffants complementara a la famiglia èn vegnidas augmentadas.

Las reducziuns dals custs vegnan regladas sur l'applicaziun web «quint» ch'è vegnida sviluppada aposta per quest intent e ch'è gia introducida en canortas ed en famiglias dal di. La nova lescha presta ina contribuziun impurtanta a favur da l'attractivitat dal Grischun sco lieu economic e stgaffescha bunas cundiziuns generalas per famiglias en l'entir chantun.

>[Tgira d'uffants complementara a la famiglia](#)

Viver cun in impediment – participaziun, egualitad e protecziun cunter discriminaziun

Cun in punct central da svilup en il Program da la Regenza 2025–2028 vul la Regenza rinforzar la participaziun e l'egualitad da persunas cun impediments. La finamira è quella da realisar vinavant la Convenziun da l'ONU davart ils dretgs da las persunas cun impediments (CRPD) en il chantun Grischun. In element da quai è er la protecziun efficazia cunter discriminaziun.

Dapi il schaner 2025 procura il nov Post da coordinaziun per ils dretgs da las persunas cun impediments e per l'egualitad, che las mesiras vegnian realisadas pass per pass e confirm als basegns. L'incumbensa centrala è qua la realisaziun dal plan da mesiras che sa basa sin in'analisi cumplexsiva da la realisaziun da la CRPD. Uschia vegn messa la basa impurtanta per dapli inclusiun e per dapli egualitad da las schanzas.

> [Convenziun davart ils dretgs dals umans cun impediments](#)

Il sistem per gestunar ils cas dals fatgs socials daventa plaunet realitad

Il svilup dal nov sistem per gestunar ils cas dals fatgs socials «gira.gr» avanza bain. La finamira è quella da simplifitgar ils process administrativs e da rinforzar la qualitad da la cussegliaziun en l'entir chantun, e quai cun in barat da datas segir ed efficient tranter il chantun, las vischnancas sco er las clientas ed ils clients:

- Gestun da cas moderna: soluziun favuraivla cun bleras funcziuns e cun ina tecnologia moderna
- Gestun centrala da la IT: gestun, mantegniment e support tras il chantun
- Andaments effizients e digitalisads: simplificaziun da la gestun dals cas senza spediziun per posta, reducziun da la lavur administrativa
- Process d'agid social effizients: simplificaziun per far la dumonda, la disposiziun, la calculaziun ed il pajament da l'agid social material
- Calculaziun da la restituziun: fixaziun simpla da l'import da l'agid social che sto vegnir restitui
- Aliments: administraziun effizienta dal pajament anticipà d'aliments e da l'incasso
- Gulivaziun da las grevezzas socialas: dumonda svelta ed examinaziun speditiva da contribuziuns or da la GGS

Il project vegn realisà tenor urari: cumenzament il schaner 2026 per vischnancas pitschnas e per cas cun il status da protecziun S. Il rollout en tut il chantun suonda l'onn 2027.

> [«gira.gr» – infurmaziuns per vischnancas / partenaris](#)

Dis d'acziun cunter violenza a chasa 2025

Dals 25 da november fin ils 10 da december 2025 han lieu per la 7. giada ils Dis d'acziun cunter violenza a chasa. En il focus stat quest onn il tema «Violenza cunter persunas cun impediments». En Svizra vivan var 1,9 milliuns persunas cun impediments – ellas èn spezialmain periclitadas da daventar victimas da violenza, sch'ellas dovran sustegn en il mintgadi u sche lur abilitads da communitgar e da proteger sasezzas èn restrenschidas. Periclitadas èn spezialmain dunnas e mattas cun impediments.

Cun ils dis d'acziun vulain nus dar ina vusch a las persunas pertutgadas, augmentar la conscienza publica e metter in ferm signal cunter la violenza a chasa. La populaziun è envidada da visitar las occurrenzas e las acziuns. L'entir program vegn mess en la rait l'atun sut [Dis d'acziun cunter violenza a chasa 2025](#).

Politica d'uffants e da giuvenils: vuschs giuvnas gidan a concepir l'avegnir

La primavaira 2025 han persunas giuvnas tranter 12 e 25 onns discutà activamain en il chantun Grischun davart la politica futura d'uffants e da giuvenils en il Grischun. En lavuratori da participaziun ed al «Dialog per l'avegnir: giuventetgna e lescha» a Glion han els fatg valair directamain lur giavischs ed emprendi d'enconuscher andaments politics. Ils resultats da quest dialog vegnan ussa integrads en l'elavuraziun da la nova lescha. La consultaziun publica respectiva è prevista per l'onn 2026.

[> Politica d'uffants e da giuvenils](#)

Agid social en transformaziun: barat tranter las vischnancas a chaschun da l'occurrenza per las vischnancas

A chaschun da l'occurrenza per las vischnancas 2025 il cumenzament da l'onn èn las persunas responsablas da las vischnancas grischunas sa barattadas activamain per sviluppar vinavant l'agid social – in tema central en il Program da la Regenza 2025–2028. Il president da la Regenza Marcus Caduff ha avert l'occurrenza ch'è vegnida accumpagnada da la Scola auta spezialisada OST. L'organisaziun actuala da l'agid social en il chantun Grischun vegn beneventada da las participantas e dals participants. Interess datti cunzunt per l'ulteriur svilup da la collavuraziun, da la finanziaziun e da la digitalisaziun. Il USo ha infurmà davart la revisiun parziala da la Lescha davart l'agid social, davart la modernisaziun da la statistica d'agid social sco er davart il stadi da svilup dal nov sistem per gestiunar ils cas.

[> Program da la Regenza – Program da la Regenza](#)


[> Politica sociala / Organisaziun da l'agid social](#)

Inscunter da barat chantunal davart la problematica duala dependenza e violenza a chasa

Dependenza e violenza a chasa sa mussan savens ensemen e pon s'intensivar vicendaivlamain. A chaschun dal Di d'acziun naziunal davart ils problems d'alcohol ha gì lieu il matg 2025 in inscunter da persunas spezialisadas dals secturs da cussegliaziun per dumondas da dependenza, da prevenziun da violenza e da l'agid a victimas, quai per dilucidar l'interacziun complexa da la dependenza e da la violenza a chasa, per concentrar las enconuschientschas e per rinforzar la collavuraziun interdisciplinara. La problematica duala dependenza e violenza a chasa pretenda, ch'ils posts involvids lavurian tenor ina metoda coordinada e cumplessiva. L'inscunter ha dà impuls impurtants per l'ulteriura collavuraziun pli intensiva.

Savevas Vus che ...

il Grischun ha ina da las quotas d'agid social las pli bassas da la Svizra? Mo 1,1% da la populaziun – stgars mintga 93. persuna – ha retratg l'onn 2023 almain ina giada agid social economic. Per cumparegliar: La media svizra era 2,8%.



> La quota d'agid social sa reducescha per la segunda giada en fila
